

26-07-2017

Inatsisartut suleriaasiat § 37 malillugu, immikkoortoq 1 naapertorlugu matumuuna Naalakkersuisunut apeqquut imaattoq saqqummiuppara:

**Naalakkersuisunut apeqquut:**

1. **Sooruna danmark-imi napparsimasut angerlarsimaffianni kalaallit napparsimasut kalaaliminernik nerisinneqassaarsimasut ?**
2. **Danmark-imi napparsimasut angerlarsimaffianni pissutsit, Savalimmiormiunut sanilliullugit suut pitsaaneruppat imaluunniit suut ajorneruppat ?**
3. **Kalaallit danmark-imi katsorsartikkiartorlutik ilaqutaasa napparsimasup Rigshospitalimi allamiluunniit suliaritinnerata nalaani Napparsimasut angerlarsimaffianniit anisinneqaannaratik allami unnuinissamut qanoq periarfissaqartinneqarpasut ?**
4. **Kalaallit danmark-imi katsorsartittut ilaqutaannut unnuiffiusinnaasumik kommunit suleqatigalugit pilersitsisinnaaneq Naalakkersuisunit eqqarsaatigineqarsinnaavaa ?**

(Inatsisartunut ilaasortaq, Anthon Frederiksen, Partii Naleraq)

**Tunnngavilersuut:**

Kalaallit katsorsartikkiartorlutik danmark-imi Napparsimasut najungaqarfianni akiliunneqarlutik ilaquuttaminnik najungaqateqarsinnaalernerat ilaqutaasunut qujanartorujussuungunarpoq, taamaakkaluartorli napparsimasoo Rigshospital-imi

allamiluunniit suliaritissappat, ilaqutaasoq/sulluunniit Napparsimasut angalarsimaffianiit anisinneqaannartarsimapput.

Naluneqanngitsutut napparsimasut ilaqutaasullu erloqereersut, taama anisiinnarneqartarnerat napparsimasumut ilaqutaasunullu toqqissisimananngilluinnarpoq.

Taamaattumik kommunit ilaanniit eqqartorneqartareersoq, tassa naapparsimasut ilaqutaannut københavn-imi unnuiffiusinnaasumik pilersitsisinnaaneq kommunit tamaasa suleqatigalugit pisariaqarluinnartoq isumaqarpunga.

Ungasinngitsukkut paasitineqarpunga, danmark-imi Napparsimasut angerlarsimaffianni kalaallit uninngasut kalaaliminernik nerisinneqartarunnaarsimasut, naak napparsimasumut nerisassat peqqinnartut sungiusimasat pisariaqartorujussuungaluartut.

Ilanngullugu paaserusuppara, danmark-mi Savalimmiormiunut Napparsimasut angerlarsimaffianni napparsimasunut taakkualu ilaqutaannut atugassarititaasut, nunatsinniik katsorsartikkiartortut taakkualu ilaqutaannut atugassarititaasut qanoq pitsaanerutiginersut imaluunniit qanoq ajornerutiginersut. Sorliit pitsaanagerusunik atugassaqaartinneqarpat ? aamma qanoq ?

Ullut suliffiit qulit qaangiutinnginnerani akineqarnissara kissaatingaara.